

Homenage na Hubert "Lio" Booi a bira "Su anochi"



Den presencia di su famia, **Sr. Hubert "Lio" Booi** a goza na departamento Arubiana di Biblioteca Nacional, di e anochi di homenaje dedica na su persona. Un anochi dedica na Lio Booi y cu a resulta den "su anochi".

Por a ripara for di comienzo di e programa con **Sr. Hubert "Lio" Booi**, tabata gozando di e anochi aki cua cuminsa cu tocamento di **Himno di Bonaire** (su isla natal) y tocamento di himno di Aruba, "Aruba dushi tera".

Dos himno cu Sr Booi tin su nomber graba cu nan pa su letranan y **Sr. Ito Tromp** cu hopi aña a traha hunto cu Sr. Booi den Departamento di Cultura y Educacion y despues cu Instituto di Cultura, tabata e maestro di ceremonia di anochi.

E audiencia grandi cu tabata tin e anochi aki mester a scucha delaster un "redo" cu Ito a trece dilanti relaciona cu nan añanan di colaboracion cu otro y ta harimento so tabata tin, henter anochi y cu Lio Booi gozando di cada un.

Ora a cuminsa menciona bida di Sr. Booi, si tin cu bay riba tur locual el a logra y haci den su bida, ta volumen di buki lo tin su skirbi riba cada aspecto.

El a wordo presenta entre, otro como compositor, musico, poeta, pintor, metafisico, un persona polifacetico.

Ito a musta con Sr Hubert Booi a cuminsa traha na banco na Aruba como loopjongen y yega e na Procuratiehouder, bira hefe di Departamento di Cultura y Educacion di Gobierno Central cu despues a bira Instituto di Cultura di Aruba.

A repasa algun di su cancionnan cu un hobencita, di 5 aña, si mi no ta kiboca e yama **Emanuela** (?) cu a canta "E pover cabrito" y ricibi un abrazo fuerte y sunchi di e compositor. Tambe a sigui presentacion di cancionnan di cuna na papiamento cu **Arlene Wever** cu acompaña di **Maybelline Arends Croes** a presenta, mientras cu **Sr. Wim Rutgers** a presenta fragmento di un di e prozanan di Booi for di "Mislami inspiracion," y presenta filmacion di "sombra den baranca".

Di **Sra. Astrid Brete** el a ricibi compilacion di diferente grabacion y tambe **Maybelline** a presenta grabacionnan di cancionnan di Sr. Hubert Booi cu el a logra compila.



Wendy Sneek a tene e audiencia cautiva cu e dos obranan cu el a trece dilanti, "E mula pata blanco di Mondri Fierno" y "tragedia" pa seguidamente **Sr. Stan Kuiperi** papia riba e obranan di pintura di **Sr. Hubert "Lio" Booi**.

Den e biblioteca tabata tin un exposicion di e obranan y Sr. Kuiperi a considera Sr. Booi como un di e grupo di pioneronan di arte visual di nos isla.

Maybelline y **Roy Sneek** riba guitarra cu **Adeline Gomez** y parti di integrantesnan di **Coro Melange** a interpreta varios di e cancionnan di Sr. Hubert Booi, y a musta tambe riba canticanan di misa cu el a percura pa letranan na Papiamento.

E audiencia por a scucha varios composicion di Sr. Booi, graba pa **Trio los Aventureros** na principio di decada 60 y tambe a bin dilanti e diferente obranan teatral cu Sr. Booi a skirbi den transcurso di añanan y cu a wordo presenta riba nos isla.

E parti cu a percura pa mas harimento y na mes momento mas atencion, tabata ora cu **Ito Tromp** y **Eddy Tromp** a saca for di nan "baul" di "Butishi di Alegria" grabacionnan di partinan di programa den cual Hubert Booi y su obranan ta bin dilanti.

Tabata como si fuera un "obra teatral titula: Butishi di Alegria" ya cu por a "mira den bo mente" tur locual a wordo treci dilanti y hopi a comenta na final con interesante y bunita e parti aki tabata ta. Ultimo añanan mi a mira Sr Hubert "Lio" Booi na hopi actividad cultural y semper sinta cu cara serio gozando



di e actividadnan aki y tin ora "desaparece" prome cu bo haya chens di salud. Pero e anochi aki mi a mira **Sr. Hubert "Lio" Booi** ta hari; ta move curpa riba e piesanan; bira comenta cu esnan rond di dje; hari tur caminda cu humor a bin dilanti; lanta sunchi y braza cada un cu tabata tin un

presentacion y goza completamente di "SU" anochi. Bunita tabata ora cu el a bira cara mira **Sr Padu Lampe** sinta den e seccion dilanti na man robez y cu el a lanta mes ora bay braza **Padu**.

Ken por a kere diahuebs anochi, cu e shon aki ta un icono di 90 aña di edad?

Juby Naar